

Okushwekuurwa

# kw'Obusingye Mushanju bw'Ekanisa

Eshuura ya Ikumi

## Obusingye Omu Bugufu

Ahabw'okuba okwega kwaitu kubaire okushoboora omushororongo aha mushororongo kw'Ebyahandiikirwe ebiine akakwate n'obusingye mushanju, titworekire entwaza erikukuratana y'ebyafaayo by'ekanisa nk'oku twakubaire tukozi. N'ahabw'ekyo, n'ekigyendererwa kyaitu hati kutwara egi shuura, kandi kutandika n'Obusingye bwa Efeso tukuratire omu busingye bwona ekanisa n'ebyafaayo byayo nk'oku Omwoyo wa Ruhanga yaabihaire Yohaana. Nitwija kuba tutarikwongeramu ebintu bisya kureka okubuganisa ebi tushangirwe twine.

Omu kwega kwaitu twaherize kumanya ngu bingi ebiri omu Kushuuruurwa tibirikwetegyezibwa na kakye ahabw'okuba tubaire tutakamanyire ngu "ekanisa" erikugambwaho kandi erikugambirwa omu kitabo eki terikumanyisa "ekeleziya" eshemeire "entoore," "omubiri gwa Kristo," "omugore," kureka nikigambira omubiri gwona gw'abantu abarikwetwa Abakristaayo, yaaba n'ab'amazima nari abarikweyeta bo. Nk'oku Israeli yoona ETARI Israeli, nikwo n'Abakristaayo boona BATARI Bakristaayo. N'ahabw'ekyo tukeega ngu ekanisa ekozirwe omu mizaabibu ebiri, ogw'amazima n'ogw'ebishuba. Emizaabibu egyo ebiri neekoresibwa emyoyo y'emiringo ebiri; gumwe gwine Omwoyo Orikwera obwo ogundi gwijwire omwoyo gwa antikristo. Yombi neeyegamba ku erikumanya kandi erikumanywa Ruhanga. Yombi neyehamya ku erikugambirira Ruhanga. Yombi n'eikiriza amazima makuru gamwe kwonka aha gandi terikwikirizana. Kwonka obu yombi eyetererwa Eiziina rya Mukama, erikwetwa Abakris-taayo, kandi ahabw'okugira eiziina oku neyehamiza kimwe ku eine obuzaare Nawe (Ruhanga naakyeta obushwere), yombi Ruhanga hati naagijunaana n'ahabw'ekyo naagigambira yombi.

Tweyongyeire kumanya ngu egi mizaabibu ebiri neiya kukurira hamwe okuhitsya aha muheru gw'obusingye obu yombi eraakure kandi yombi ekashaaruurwa. Omuzaabibu gw'ebishuba gukaba gutarikwija kusingura kandi gukacwekyereza omuzaabibu gw'amazima, kwonka kandi, n'omuzaabibu gw'amazima gukaba gutarikubaasa kureeta omuzaabibu gw'ebishuba omu kujuna kwa Yesu Kristo.

Twegire amazima agarikukirayo kutangaaza ngu Omwoyo Orikwera akaba naabaasa kandi naija aha Bakristaayo abatahindwirwe busya ab'omuzaabibu gw'ebishuba kandi ayeyorekye omu maani omu bumanyiso bw'emiringo etarikushushana n'eby'okutangaza, nk'oku na Yuda yaabaire aine obuheereza obutarikubanganisibwaho bw'Omwoyo Orikwera n'obu we, we wenka, yaarangiriirwe kuba ari sitaane.

Twine engyenderwaho ezi omu biteekateeko ka tutandikye kukuratira ekanisa omu busingye mushanju obutarikushushana.

Ekanisa ekazaarwa ahari Pentekoote. Nk'oku Adamu w'okubanza yaahairwe omugore butsimba okuruga omu mukono gwa Ruhanga kandi akamara obwire bukwe atasiisirwe, nikwo na Kristo, Adamu ow'aha muheru, yaahairwe omugore oshemeire kandi otakwatsirweho ahari Pentekoote; kandi akaguma ayeshoroire atasiisirwe okumara akaira. "Aha bandi tihariho n'omwe owaayehangire kuteerana nabo" (Ebyakozirwe 5:13) kandi "Obutoosha Mukama yaaguma naabongyeraho abarikujunwa." Ebyakozirwe 2:47. Titurikumanya obwire obu eki kyamazire nikibaho, kwonka eizooba rimwe nk'oku na Haawa yaayohibwe kandi akabeihwabeihwa Sitaane, nikwo n'ekanisa yaasiisirwe okutaahamu kw'omwoyo gwa antikristo. "Ogwo n'omwoyo gwa antikristo ogu mwahuriire ngu nigwija, kandi na hati gwahikire omu nsi." 1 Yohana 4:3. Kandi Yesu akagamba ebikwatsire aha mugore We omuri obwo busingye bw'okubanza ati, "Kwonka Nyine eki ndikufa naiwe; okareka okukunda kwawe okw'okubanza. N'ahabw'ekyo oijukye ahu waihire waaza kugwa, oyeteise." Okushuuruurwa 2:4-5. Ekanisa omu busingye obwo bw'okubanza ekaba yaabaire "omukazi ogwire." Nk'oku Sitaane yaatangire Adamu ahari Haawa, na hati Sitaane akaba yaabeihabeihire ekanisa, omugore wa Kristo, "obugyenye bw'Omwana gw'Entaama" butakahikire. Mbweni ni kintu ki ekyabaire kiri ahagati yaayo ekyareetsire okugwa? Ti kindi kureka, Okushuuruurwa 2:6, "EBI ABANIKOLAITI BAKORA." Obusingye obwo bw'okubanza bukaba bwarugire aha kukuratira Ekigambo kya Ruhanga ekishemeire. Bakaruga aha ki Ruhanga yaaragiire ngu ekanisa Abe niwe yaagireberera buzima (kwesigira kimwe Ruhanga kuhikiiriza Ekigambo Kye kuruga aha kutandika kuhitsya aha muheru atari gavumenti y'abantu) baaza omu Bunikolaiti, nikwo kukora ekibiina kya gavumenti y'abantu omu kanisa ekiri nk'oku zaagavumenti zoonza zikora, kuteeraho abantu ebiragi. Buzima bakakora nk'eki Israeli yaakozire. Bakatooranamu obutegyeiki burungi bw'abantu omu mwanya gw'Ekigambo n'Omwoyo.

Rufu ekaba etaahiremu. Nitumanya tuta? Titurikuhurira eiraka ry'Omwoyo nirigamba munonga omu busingye obwo bw'okubanza ahari boona abariturira nk'oku Arikweta ati, "Orikusingura Ndyamwikiriza kurya aha Muti gw'Amagara, oguri omuri paradiiso ya Ruhanga."? Ekanisa ekaba omu bwire obu yaanyweire munonga aha muti gw'okufa (nari ekigombe ky'ediini ky'omuzaabibu gw'ebishuba) ogu omuheru gwagwo eri enyanja y'omuriro. Kwonka tihariho baakerubi abaine zaarurara zirikumurinkana kurinda Omuti gw'Amagara hati. Ruhanga hati tarikuruga ahagati y'ekanisa Ye nk'oku yaarugire omuri Edeni. Oo, ngaaha, Aryaguma Ari ahagati y'ekanisa Ye okuhitsya aha busingye bw'aha muheru. Okuhitsya obwire obwo Naakyeta boona kwija.

Hati nyaabura 'mwe reka hanu twegyendesereze. Obutumwa obu ahari maraika w'ekanisa ya Efeso ti butumwa aha kanisa y'omu kyaroy kya Efeso yonka. N'obutumwa aha BUSINGYE. Kandi omu busingye obwo hakaba harimu embibo y'amazima n'embibo y'obuhabe buzima nk'oku kyorekirwe omu nfumu y'oburo n'enkyenzi. Obusingye bw'ekanisa nigwo musiri, kandi omurigwo harimu oburo n'enkyenzi. Ekanisa y'ebishuba ekeekoramuk ekibiina ky'ediini, yaataho obwebembezi bw'abantu kandi Ekigambo yaakitwara omu buryo bw'obuntu, kandi jaarwanisa Abakristaayo b'amazima.

Enkyenzi buriijo zikura juba munonga okukira oburo nari ekindi kimera kyona ekihingirwe. Ekanisa y'enkyenzi ekakura jubajuba omu busingye obu bw'okubanza. Kwonka ekanisa y'oburo nayo ekaba neekura. Aha muheru gw'obusingye bw'okubanza ebikorwa by'Abanikolaiti bikaba nibyeyongyera munonga omu makanisa g'omuzaabibu gw'ebishuba ag'omu bicweka ebyo obwo nigagyezaho kujanjaaza ebikorwa byago hare munonga y'ebibiina byabo. Okuturiza okwo kukareebeka omu kanisa y'amazima ahakuba abashaija nk'ow'ekitiinisa Polycarp bakaba nibeeyeta baabishopu nibagamba aha makuru agari omu kitiinisa ekyo ekyabaire kitaroho kurugiirira aha Kigambo. Kandi omu busingye obwo, ekanisa y'amazima ekaba erekire okukunda kwayo kw'okubanza. Rukundo egyo ekaba neeshushanisibwa nka rukundo y'omugore na kishwera aha bugyenye bwabo bw'obushwere n'emya kya y'okubanza omu bushwere bwabo. Hakabaho okuhora kw'egyo rukundo eijwire n'okutsigaho Ruhanga.

Kwonka yetegereze. Okushuuruurwa 2:1 neeshoboorora Mukama Yesu nk'ori rwagati y'ekanisa Ye kandi akwaitse entumwa omu mukono Gwe gwa buryo. Ahabw'okuba omugore ugu agwire, ahabw'okuba ekanisa yona hamwe hati n'orujwangye rw'ab'amazima n'ab'ebishuba, Tarikugitsigaho. N'eye. Kandi okurugiirira aha Barooma 14:7-9 ekyo kihikire buzima. "Ahakuba omuriitwe tihariho obaho ahabwe wenka, kandi tihariho ofa ahabwe wenka. Ku tubaho, tubaho ahabwa Mukama; kandi ku tufa, tufa ahabwa Mukama; n'ahabw'ekyo, yaaba twabaho, yaaba twafa, turi aba Mukama. Ekyo nikyo Kristo yaafeereire kandi akazooka, ngu Abone kuba Mukama w'abafiire n'abahuriire." Aha musharaba Akagura ensi YOONA y'abantu. N'Abe. Niwe Mukama w'abahuriire n'abafiire. (Ekikwatiraine n'okuba Abe, ATARI obuzaare). Kandi Naagyendagyenda ahagati y'ekibiina ekyo ekirimu amagara n'okufa.

Ekyabyairwe omu busingye bw'okubanza nikijja kukurira omu busingye bwa kabiri n'omu busingye obundi bwona okuhitsya obu kirihika aha kwera n'okushaaruurwa. N'ahabw'ekyo omu Busingye bwa Sumuruna nitutegereza okuhanguha n'okumurikirwa kw'ebyafaayo by'ekanisa yona hamwe kurabira omu kushuuruurwa kw'Omwoyo.

Omu busingye obu rwango y'omuzaabibu gw'ebishuba neeyeyongyera. Waareeba, beetaaniise (omushororongo gwa 9) n'ekibiina ky'ab'amazima. Bakabarugamu. Bakaba bari abanyabishuba. Bakeeyeta eki baabaire batari. Kwonka Ruhanga akabacwekyereza? Ngaaha. "Barekye, kandi bombi nibaija kuhika aha igyesha."

"Kwonka, Mukama, bashemereire kucwekyerezibwa ahakuba nibacwekyereza abantu Baawe. Nibabaita."

"Ngaaha, barekye. Kwonka aha mugore Wangye Ningira nti, 'Guma ori omwesigwa okuhitsya aha kufa. Onkunde nangwa n'okukiraho."

Nitwega omu buryo obutarikubanganisibwaho ngu ugu muzaabibu gw'ebishuba n'omuzaabibu gwa Sitaane. Okuteerana kwabo n'okwe (Sitaane). Nibabugana omu Iziina rya Ruhanga kandi babeiha ngu n'aba Kristo. Nibabuurira, beegyesa, babatiza, baramya, bakora emigyenzo etari emwe Kristo ei yaahaire ekanisa, kwonka nabwo tibari aba Ruhanga. Kwonka obu barikugira ngu nibo, Ruhanga naija kubajunaana kandi omuri buri busingye Naabagambaho kandi abagambira. Buzima nibatwijutsya ebya Balamu. Akaba aine ofiisi ya nabi. Akaba naamanya okwirira haihi Ruhanga okuhikire nk'oku kyayorekirwe omu kutamba kw'enyamaishwa ezishemeire. Baitu, akaba atari NABI KIGAMBO w'amazima, ahakuba, Ruhanga ku yaamugambiire ngu atagyenda kuha Balaki ekitiinisa ahabw'okubaho kwe, akasherura oburyo bw'okugyenda oku biri kwona, ahakuba akatwarwa omururu gw'enzaabu n'ekitiinisa. N'ahabw'ekyo Ruhanga akamureka yaagyenda. Okukunda kwa Ruhanga okuhikire kukahigiza okukunda kwa Ruhanga okugyemirwe "ahabw'okwetenga kw'omutima" gwa Balamu. Ruhanga buzima akagira ati, "Gumizamu." Ruhanga akahindura enteekateeka Ye? Ngaaha sebo. Ruhanga akahikiiriza Okukunda Kwe n'obu kiraabe kiri ngu Balamu akagyenda. Balamu taraihireho okukunda kwa Ruhanga. Ruhanga akahikiiriza Okukunda Kwe n'obu kiraabe. Ni Balamu owaafeereire ahakuba akatsigaho Ekigambo. Kandi ebiro ebi twine ekintu nikyo kimwe buzima. Abakazi ababuurizi, ekibiina ky'ediini, enyegyesa z'ebishuba, n'ebindi, kandi abantu nibaramya Ruhanga, nibooreka ebiconco by'Omwoyo kwonka nibagumizamu nk'oku Balamu yaakozire, nibagira ngu Ruhanga agambire nabo n'obu obutumwa obu barikuba batungire butarikwikirizana n'Ekigambo ekishuurwirwe. Kandi tindikwija kuhakana ngu Ruhanga tagambire nabo. Kwonka ni nk'obu Yaagamba na Balamu ogwo murundi gwa kabiri. Ahakuba Akaba naamanya ngu Balamu akaba naayenda ekyetengo ky'omutima gwe okukira Ekigambo, atyo ekyo Ruhanga yaakimuha, kandi obwire bwona, aha muheru, akakora nk'oku WE WENKA yaabaire naayenda n'obu kiraabe; nikwo n'ebiro ebi Ruhanga arikugambira abantu kugumizamu n'ebyetengo by'emutima yaabo, ahakuba baaherize kwanga Ekigambo. KWONKA NABWO OKUKUNDA KWA RUHANGA NIKUZA KUKORWA N'OBU KIRAABE KIRI KITYO. Amiina. Nyine amatsiko ngu eki nimukireeba. Tikirikwija kushoboorora kwonka bingi ebirikureebwa omu busingye bwona kureka nikijja n'okuhwera namunonga omuri obu busingye bw'aha muheru oburimu okweyoreka kwingi kw'ebiconco n'emigisha y'aharuguru kunu obwire obwo bwona nibahakanisa munonga "Okukunda kwa Ruhanga-Okushuurwirwe-Ekigambo."

Ku haraabe hariho obusingye oburatungire obutumwa omu buryo oburikurahuka kwetegyezibwa gye kandi obushoboorokire, n'obusingye obu. Kikaba kiri, kandi kiri ngu, ago mazima g'omu Ndagaano eya Ira, “Omwana w'omuzaana naija kubonabonesa omwana w'omukazi nyeiteeka okuhitsya obu omwana w'omuzaana arinagwa aheeru.” Ekyo nikituma twamanya ngu rwango n'okurogota kwa Sitaane aha Bakristaayo b'amazima kuryarabira omu kibiina ky'Abakristaayo omu iziina kwonka, ab'ebishuba, kandi eki kiryayeyongyera okuhitsya obu Ruhanga arikuura ogwo muzaabibu gw'ebishuba aha muheru gw'Obusingye bwa Laodikea.

Obusingye bwa kashatu bukashuuruurwa Omwoyo w'obunabi ngu ekanisa y'ensi neija kwikiriza Obunikolaiti nk'enyegyesa. Okwetaanisa kw'abakuru b'ediini abatendekirwe n'abakuratsi kukeeyongyera kuruga aha mazima ga Baiburi agarikukwata aha bakuru b'ekanisa (abariisa b'abantu b'omu mwanya etari emwe) kutegyekyesa abantu Ekigambo, kwahika aha kuba “ebikorwa by'Abanikolaiti” omu abakuru b'ediini abatendekirwe baayeteire omu madaara g'ebitiinisa omwe ahaiguru y'ondi, egyo nkora etari omu Byahandiikirwe ekahindikamu obunyamurwa obwataire abakuru b'ediini abatendekirwe ahagati y'abantu na Ruhanga, bwagira bumwe aha bugabe obu bwaha abakuru b'ediini abatendekirwe kwonka obwire bwona abakuratsi bwabaihaho obugabe bwabo obu Ruhanga yaabahaire. Eki kikaba kiri okwaka omuntu obushoboorozi bwe. Omu busingye obu ekahinduka enyegyesa. Yaatanika omu kanisa nk'Ekigambo kya Ruhanga ekihamire, ekyabaire buzima kitari kwo. Kwonka abakuru b'ediini abatendekirwe bakakyeta Ekigambo kya Ruhanga n'ahabw'ekyo egyo nyegyesa ekaba eri antikristo.

Ahabw'okuba gavumenti y'abantu n'eby'obutegeye byonka, ekanisa ekeejwanzya omu by'obutegeye. Okwejwanzya oku kukatangirirwa ngambanyenka omugabe owaagaitisire eby'obutegeye by'ekanisa n'eby'obutegeye bya gavumenti kandi ahabw'okugyema yaatanika ekanisa y'ebishuba (ediini y'ebishuba ya Sitaane) nk'ediini y'amazima. Kandi okurabira omu biragiro bitari bimwe eby'abagabe abatari bamwe nitureeba ekanisa y'ebishuba eine amaani ga gavumenti neecwekyereza omuzaabibu gw'amazima n'obweziriki bwingi munonga.

Eky'obusaasi kiri ngu enyegyesa egi buzima ekaturira omuzaabibu gw'amazima. Okugamba ekyo tindikumanyisa ngu omuzaabibu gw'amazima guratandikireho enteekateeka y'Abanikolaiti nk'enyegyesa. Nikikabure. Kwonka ako kakooko kakye ka rufu kakaguma nikanyuunyutsa omuzaabibu gw'amazima kaine amatsiko ngu nigubaasa kugwa. Nangwa n'omu kanisa ey'amazima, abashaija abu Ruhanga yaabaire ayetsire nk'abareberezi bakaba baine ekyo kitiinisa kumanyisa ekirikukira aha kugira obujunaanizibwa omu kanisa y'omu mwanya nanka. Kukaba kutari okwetegyezera gye Paulo okwabaire kuriho omu kanisa obwire obu. Ahakuba Paulo akaba yaagizire ngu, “Bakahimbisa Ruhanga ahabwangye.” N'obu Paulo araabe yaabaire aine obushoboorozi oburikwingana ki, akagambira abantu amaisho kuguma bagahangire Ruhanga Ou obushoboorozi bwona bukomookaho. Kwonka abakuru b'ediini abatendekirwe burijjo amaisho bakaba bagahanga Obwebembezi bwa Ruhanga hamwe N'OBW'ABANTU, kandi omu buryo obwo bw'okuha ekitiinisa ahu ekitiinisa kyabaire kitashemereire, nitushanga ngu ekanisa y'amazima ekagiibwaho amabara g'enkora z'obuntu. Obunikolaiti ku bwatandikire - okuhungurirana kw'entumwa - abaheereza abatairweho abantu - abariisa abateereirwe akaruuru, n'ebindi, ekaba eri entambo emwe yonka ey'ekanisa y'ebishuba kugumizamu kuza omu nyegyesa ya Balamu. Entambo ya kabiri kuza omu “bi abandi beeta enaama za Sitaane” ekaba hati neegyendera kimwe omu maisho.

Egi ntambo ya kabiri ekaba eri enyegyesa ya Balamu, (egambirweho omu Kushuuruurwa 2:14) omu Balamu yaayegyese Balaki kuteeza entsibo Abaisraeli omu “ruteerane rw'okukwatanisa.” Okwo abagyenyi bakaba nibaza kukora ebintu ebindi bibiri ebiteishukire aha Kigambo kya Ruhanga. Noiija kwijuka ngu Balaki akaba naayetenga obuhwezi kugumya obukama bwe. Akeeta omuntu orikukirayo obukuru omu by'omwoyo ow'omu biro bye, Balamu. Balamu akaha obwengye obwategire kandi bukacwekyereza Abaisraeli. Okubanza kwa byona, kikaba kiri okuteesa ngu boona beeteerane kandi bagire ebi baagaaniiraho, kandi barye hamwe bagire ebintu ebi baashoboorora. Nabwo, okwetegyezera ni kikuru. Waahikiiriza ekyo, noobaasa kwihirira aho. Entambo eraakurateho neeba okuramiza hamwe, kandi oku biri, okugyemesereza kukye kw'otaayaayiise abagyenyi kaingi kureetera abagyenyi kutwaza okukira oku baakubaire nibenda. Hati ekyo tikirabaire enyima okwo aha kanisa ya Ruhanga ey'omu Ndagaano eya Ira yonka kureka kikaba n'aha kanisa y'omu Ndagaano Ensyu, ahakuba hakaba hariho omugabe, ori, nka Balaki, owaabaire naayetenga obuhwezi kurinda obugabe bwe. N'ahabw'ekyo Konsitantiini akeeta abo abaabaire nibeeyeta Abakristaayo, Ekanisa Enkristaayo ey'Okubanza ya Rooma, kumuhwera kutunga obushagiki bw'Abakristaayo ahabw'okuba bakaba bari ekibiina kihango munonga. Ekyarugiremu kikaba Orukiiko rwa Niika orw'omu mwaka gwa 325. Aho Abakristaayo, ab'amazima hamwe n'abatahamize, bakateeranira hamwe beetsirwe Konsitantiini. Abakristaayo b'amazima bakaba batashemereire n'okuza omu ruteerane orwo. N'obu Konsitantiini yaabaasize kukora byona kubagaita boona, abaikiriza b'amazima bakamanya ngu bakaba batashemereire kuba omu mwanya ogwo, n'ahabw'ekyo baayegyendera. Kwonka ahari abo abaatsigaire, Konsitantiini akabaha aha sente za gavumenti hamwe n'amaani g'eby'obutegeye n'ag'obuntu. Abantu bakabataasya omu kuramya ebishushani n'okugamba n'emyoyo ey'abaafiire, ahakuba ebishushani ebiramibwa biine amaziina g'abarikwera bikateebwa omu byombeko kandi abantu baayegyesibwa kugamba n'abaafiire, nari kushaba abarikwera abaafiire ekitari kindi kureka kugamba n'abaafiire. Ahakuba omu mwanya gw'eby'okurya ebi omuntu ayetenga buzima, Ekigambo kya Ruhanga, bakaheebwa enyikiriza z'ediini, ebigunjano, n'emigyenzo nabyo ebi gavumenti yaabaire egyema, kandi okukira byona bakaheebwa baaruhanga bashatu abaine eiziina ry'obushatu rya Ruhanga Omwe w'Amazima, kandi okubatiza omu maizi omu Iziina rya Mukama Yesu Kristo baakwihaho baataho okubatiza kw'ekipagaani omu byeterero bishatu.

Abaikiriza b'amazima bakaba batashemereire kuzayo. Bakaba baherize kufeerwa amazima maingi, mbwenu hati, nabwo, bakaba nibaza kufeerwa okwetegyereza Obwaruhanga kandi bafeerwe n'okubatiza omu iziina reero babatize omu byeterero omu maizi.

Hati reeba enyegyesa egi ya Balamu n'obwegyendesereza munonga. Yetegyereze okukira byona, ku kari akakodyo k'abakuru b'ediini abatendekirwe babi kwekomeraho abantu, obwo bagyendereire kutaasya abantu omu kibi ky'obutaikiriza. Enyegyesa y'Abanikolaiti ekaba eri okusiisikara kw'abakuru b'ediini abatendekirwe abaabaire nibasherura obushoboorozi bw'eb'obutegyeki bonka na bonka, kunu enkora ya Balamu eri okuta abantu omu ntwaza zaabo z'enyikiriza y'ediini n'okuramya kwenda ngu bagume babaine. Hati reeba eki n'okwegyendesereza. Niki ekyakomeire abantu aha kanisa etari y'amazima kandi omu buryo obwo kikabacwekyereza? Zikaba ziri enyikiriza z'ediini n'ebigunjano biteirwe omu nyegyesa z'ekanisa. Ekaba eri enyegyesa y'Ekanisa Enkatorika ya Rooma. Tibarahairwe eby'okurya by'amazima, Ekigambo. Bakaheebwa eby'okurya ebyarugire omu kuramya ebishushani, obupagaani bwa Babulooni bushembirwe omu nkoresa y'ebigambo by'Ekikristaayo. Kandi omwoyo ogwo gwonyini n'egyo nyegyesa biri omu Bapurotesitante boona kandi nigwetwa EKIGOMBE KY'EDIINI. Obunikolaiti ni ekibiina ky'ediini, obwebembezi bw'ekanisa kuhindurwa obw'obuntu, kandi omu buryo obwo Omwoyo Orikwera akaimuurwa. Enkora ya Balamu n'enkora y'ekigombe ky'ediini erikukoresa ekitabo ky'enyegyesa z'ekanisa omu mwanya gwa Baiburi. Kandi na hati omu shaaha egi, baingi omu bantu ba Ruhanga bakwatiirwe omu mutego gw'enkora y'ekigombe ky'ediini kandi Ruhanga naabeeta n'eiraka rihango ati, "Mururugyemu, imwe bantu Bangye 'mwe, mutakaakwatanisa narwo omu bibi byarwo, mukaheebwa ekifubiro ky'ebirikwija kurubonabonesa." Nooreeba tibarikumanya. Kwonka okutwarwa ku kwakubaho amagingo aga, obutamanya tibukaaba eiramuriro ry'okujurizamu kuhunga orubanja rwa Ruhanga ahabw'okushangwa omu bantu abagwire.

Abakuru b'ediini abatendekirwe kwekoramu ekibiina beehaire ebitiinisa ebirikukirakirana okuhitsya obu aha muheru barikwebemberwa purezidenti n'ekirikworeka omwoyo gwa antikristo, n'obu kyakureebeka kiri kirungi kita kandi kirikwetengwa. Ti kindi kureka n'okuteekateeka kw'obuntu omu mwanya gw'Ekigambo. Kandi omuntu weena ori omu kibiina ky'ekigombe ky'ediini buzima ari ahagati y'entwaza ya antikristo. Hati reka ngambe eki kandi nkishoboorore kurungi munonga. TINDIKUHAKANISA ABANTU. NIMPAKANISA ENTWAZA.

Ahanyima y'okwegaita kwa gavumenti n'ekanisa orubuga rutebeekanisiibwe ahabw'Obusingye bw'Omwirima. Kandi buzima nk'okumara emyaka 1,000 ekanisa ekaza omu mwirima ndi ndi ndi, erikumanya ebi abandi beeta enaama za Sitaane. Abantu abanyadiini ku baikiriza Obunikolaiti n'enkora ya Balamu, kandi bakashagikwa amaani g'eb'obutegyeki, ag'esente n'ag'omubiri hariho omuhanda gumwe ogu barikubaasa kutooram. Omuhanda ogwo n'ogw'okuza omu nyegyesa ya Yezebeeli. Hati ahabw'enki nitugamba eki? Nabw'okuba nk'oku twayorekire omu kwega kw'omu busingye bwa kana ku Yezebeeli yaabaire ari Omunyasidoni, muhara wa Esi-baali owaabaire ari omugabe omunyamurwa w'emandwa y'Asitate. Esi-baali akaba ari omwitsi. Omukazi ogu akashwerwa Ahabu (omugabe wa Israeli) ahabw'enshonga z'eb'obutegyeki. Bwanyima Yezebeeli yaategyeka ediini y'abantu kandi yaita Abaleevi, bwanyima yaayombeka zaahekalu omu yaareeteire abantu kuramya emandwa Asitate (Venus) na Baali (ruhanga w'eizooba). Akagunja enyegyesa kandi yaataho abanyamurwa be kugyegyesa, kandi nabo baagaruka baareetera abantu kugiikiriza. Aho noobaasa kureeba gye egyo eyaabaire neyeyeta ekanisa eki yaabaire eri omu Busingye bw'Omwirima. Bakatsigiraho kimwe Ekigambo kya Ruhanga kureka amaziina n'eb'yeterero by'Obwaruhanga n'ebikuru bikye by'Ebyahandiikirwe. Bakacurinkanisa ebi baihire omu Baiburi baahindura amakuru gaabyo. Ekibiina kyabo ekya baabishopu, n'ebindi, kakahandiika ebitabo bingi munonga, baapaapa baabo baayrangirira ngu tibakaashobya kandi baagira ngu bakaba nibatunga okushuuruurirwa kuruga ahari Ruhanga kandi bagambira abantu nka Ruhanga. Ebi byona bakabyegyesa abasaserdooti kandi ahabw'okutiina nabo baabikiririsa abantu. Okuhakanisa kuba kuri okwitwa nari okubingwa omu kanisa ekyabaire nikibaasa kuba eky'akabi munonga okukira kufa. Hati ekaba eri ekanisa eine iraka erihamire eyaategyekire, kandi barikukozesa obushoboorozi nk'abagwa-eiraro bakanywa eshagama y'abaafeereire okwikiriza okuhitsya obu Abakristaayo b'amazima boona haihi baamazirweho kandi hakaba haihi hatakiriho Ekigambo kyona ekitsigaire, n'okweyoreka kukye kw'ebiconco by'Omwoyo Orikwera. Kwonka omuzaabibu gw'amazima gukangisiriza kandi gwakira. Ruhanga akaba omwesigwa aha busyo bukya kandi n'obu Rooma yaakubaasize kugira eki yaakora aha mibiri yaabo, Rooma ekaba etarikubaasa kwita Omwoyo obarimu, kandi omushana gw'Amazima gukagumizamu nigujwa, nigushagikwa Omwoyo Orikwera n'amaani.

Ogu n'omwanya murungi gw'okushoboorora n'okworeka gye omushana. Reeba. Ebikorwa n'enyegyesa z'Abanikolaiti, enyegyesa ya Balamu, hamwe n'okwegyesa kwa nabikazi w'ebishuba, Yezebeeli, tibirikukora emyoyo eshatu nari kukora engyenderwaho z'emyoyo eshatu. Ebi bishatu n'okweyoreka okutari kumwe kw'omwoyo omwe gwaba nigweyongyera kutsimba emizi. Eki kiri, n'omwoyo gwa antikristo gw'ekibiina ky'ediini omu madaara ashatu gaagwo agatari gamwe. Abakuru b'ediini abatendekirwe ku baayetaaniise kandi bakeekoramu ekibiina kyediini bakabonabonesa abantu nibabeebembera kubataasya omu kibiina, kandi n'okubakomeramu. Ekibiina ky'ediini eki kikaba kiri aha musingye gw'enyikiriza z'ediini n'ebigunjano ebi baayegyese abantu omu mwanya gw'Ekigambo kya Ruhanga ekishemeire. Emigyenzo n'emikoro bikaheebwa ekicweka kihango omu kuramya, kandi omu kaire kakye entwaza egi yoona ekaba eky'okurwanisa n'amaani ga sitaane agaakozire oku garikubaasa kutegyeka boona kurabira omu kwikiririsa kw'okugamba nari kukoresa okugyema. Entwaza egi ekatunga amaani gaayo kuruga omu bunabi bwayo obw'ebishuba kwonka kitari Kigambo kya Ruhanga. Hati buzima ekaba eri antikristo n'obu yaizire omu Iziina rya Kristo.

Ahanyima y'ekyareebekire nk'obwire obutaine muheru omu Amazima garikuteekwa kufa buzima, abantu bakatandika kuhakanisa obubi bw'Ekanisa Enkatorika ya Rooma, ahabw'okuba tikikaabaasa n'okwija omu biteekateeko by'omuntu ngu Ruhanga akaabaasa kuba omu nyegyesa nk'egyo n'omu mitwarize nk'egyo. Obwesharingo obu bakaba obumwe batabwetaho butyo buhwaho ahabw'okuremwa kwimutsya abantu kubutaho omutima, nari Rooma ekaba ebucwa busha. Kwonka kandi, Ruhanga omu mbabazi Ze ezirikwemariirira akoohera entumwa erikwetwa Martin Luteeri kutandikaho okuhunduuza. Akakorera omu mbeera obu Ekanisa Enkatorika ya Rooma yaabaire ehairwe omugoye muraingwa munonga okuhitsya obu yaabaire eri haihi kwehanika. N'ahabw'ekyo Luteeri ku yaabuiriire okwihwaho orubanja ahabw'okwikiriza omuzaabibu gw'amazima omurundi gw'okubanza omu myaka amagana n'amagana gukatandika kukura n'amaani. Nk'oku egyo erikweyeta ekanisa yaakoreise obushoboorozi bwa gavumenti kugishagika, hati obushoboorozi bwa gavumenti bukatandika kugirwanisa. Kandi aha niho Luteeri yaakoreire enshobi, kandi n'abaikiriza b'amazima niho baakoreire enshobi. Bakaikiriza gavumenti kubahwera. N'ahabw'ekyo obusingye obu tibwatsimbire emizi munonga omu Kigambo. Ruhanga asiimwe kureeba ngu bukatsimba emizi bwahika ahu bwahikire, kwonka ahabw'okuba bukeegamira obushoboorozi bwa gavumenti ekirikumara, obusingye obu bukahereerukira omu kibiina ky'ediini, kandi ekibiina eki omu busingye bwa Luteeri ekyabaire kirugire aha muzaabibu gw'ebishuba, hati kikagaruka kyaba muhara wa maraaya ahakuba kikagiira kimwe omu Bunikolaiti n'omu nkora ya Balamu. Omu busingye obu hakaba harimu ebibiina bingi ebyecweiremu, kandi okworeka oku baabaire bari hare n'embibo y'amazima n'okushoma ebyafaayo kwonka okareeba oku baahiigaine, okuhitsya n'aha kwitana obumwe n'obumwe. Kwonka hakaba harimu amaziina make omuribo, nk'oku buriijo gabaho omuri buri busingye.

Nitwesiima omu busingye obu ahabw'ekintu kimwe eki. Okuhunduuza kukaba kwatandikire. Kukaba kutari okuzooka kureka okuhunduuza. Kukaba nangwa kutari okugarurwa busya. Kwonka akajuma k'engano akaafiire ahari Niika kandi kakajunda omu Busingye bw'Omwirima, hati kakareeta akatwe k'amazima kirikumanyisa ngu omu biro by'omu maisho, aha muheru gw'Obusingye bwa Laodikea, nihaburaho obwire bukya Yesu akaija, ekanisa ekaba neza kugaruka kuba Omugore Embibo Engano obwo enkyenzi nizigyeshwa kandi nizookibwa omu nyanja y'omuriro.

Obusingye bwa kataano ku bwareetsireho okujanjaara kw'amaani kw'Ekigambo kurabira omu kyoma kuteera ebitabo, obusingye bwa mukaaga bukarahuka kukoresa omugisha ogwo. Obusingye obu bukaba buri eitembero rya kabiri ry'okugarurwa busya kandi nk'oku twagamba enyimaho bukaba buri obusingye bw'eshisha. Obwegyese bukeeyongyera. Obu bukaba buri obusingye bw'abantu abeegire abaabaire nibakunda Ruhanga kandi Bakamuheereza. Abamiishani bakeeyongyera kandi Ekigambo kyabuga ensi yoono. Bukaba buri obusingye bwa rukundo y'ab'eihe-emwe. Bukaba buri obusingye bw'orwigi orwigwire. N'obusingye obw'aha muheru obwamazire obwire buraingwa, kandi ahanyima yaabwo Obusingye bwa Laodikea bukaba nibuza kukurataho obwabaire nibuza kuba bugufu.

Omuzaabibu gw'amazima gukakura gye omu busingye obu okukira oku kitarabaire omu bundi waateekateeka aha mubaro mwingi ogw'omu ka n'eseeri y'amayanja. Obusingye obu bukarereeta abantu abarikwera omu maisho. Omuzaabibu gw'amazima gukajanjaara kandi omuzaabibu gw'ebishuba gwakyeendeera. Hoona ahu omuzaabibu gw'amazima gwagiire Ruhanga akaha omushana n'amagara n'okushemererwa. Omuzaabibu gw'ebishuba gukooreka eki gwabaire guri: omwirima, okushoberwa, obworo, obutamanya hamwe n'okufa. Kandi nk'oku omuzaabibu gw'ebishuba omu biro byagwo by'obushoboorozi gutarabaasize kwita omuzaabibu gw'amazima, n'omuzaabibu gw'amazima gukaba gutarikubaasa hati kugarura omuzaabibu gw'ebishuba ahari Yesu Kristo. Kwonka omuzaabibu gw'ebishuba gukatsimba emizi, gutegereize ekicweka ky'aha muheru ky'obusingye bw'aha muheru obu gwabaire niguza kusingura boona kubeegarurira okwihaho obwo busyo bukya obwabaire buri entoore, omuzaabibu gw'amazima gwa Ruhanga.

Kwonka obusingye obu ka nibutuma twagira obusaasi ku turikwetegereza ngu buri nkora nkuru ya Ruhanga (kandi zikaba ziri nyingi) batafeyo kunaga hare enyegyesa y'Abanikolaiti ahakuba boona bakeekoramu ekibiina ky'ediini batyo baafa. Reero baakora ebigombe by'amadiini by'okutsibiramu abafiire omu mwoyo omu mariisizo agatarimu by'okurya. Tibarakimanyire, kwonka buri kibiina kikaba kirimu obutashemera bw'obwo buhabe, kandi omuriro gw'okusisiimuka ku gwakyeenderiire, ekibiina ky'ediini kyategyeka kandi abantu baahinduka ebigombe by'amadiini. Bakaba bari Abakristaayo abatahamize buzima n'obu buri kibiina kyabaire nikyegambaho nikyehamya omu buryo nibwo bumwe obu Ekanisa Enkatorika ya Rooma erikwehamya ngu bakaba bahikire kandi ngu abandi boona bagwire. Buzima orubuga rukaba ruteirweho ahabw'abahara kugarukayo omu ka omu busingye obw'aha muheru, kugaruka Rooma, ahansi ya nyinabo enkoko.

N'ahabw'ekyo twahika aha busingye bw'aha muheru: Obusingye bwa Laodikea. Obwo nibwo busingye bwaitu. Nitumanya ngu nibwo busingye obw'aha muheru ahabw'okuba Abayudaaya bagarukire omuri Palesitani. Oku baahikireyo kwona; bariyo. Kandi obu n'obwire bw'eigyasha. Kwonka hatakabaireho igyasha nihateekwa kubaho okwera, okukura kw'emizaabibu yombi.

Obusingye bwa Luteeri bukaba buri obunaku bw'okutooka kw'ebimera. Obusingye bwa Wesili bukaba buri ekyanda ky'omushana gw'okukuza. Obusingye bwa Laodikea n'obwire bw'eigyasha bw'okushanguruza enkyenzi okuziboha hamwe n'okuzootsya; hamwe n'okuhunikira Mukama engano.

Obwire bw'eigyasha. Nookimanya ngu omu bwire bw'eigyasha, n'obu okuhiisa kuraabe nikwanguha munonga,

kwonka habaho okukyendeera omu kukura okuhitsya obu okukura kuhwaho buzima? Ekyo tikyo buzima turikureeba hati? Omuzaabibu gw'ebishuba nigufeerwa omutwe gw'abantu barikuza omu Bukomyunisiti n'omu nyikiriza z'emiringo etari emwe. Omubaro gw'abashomi baagwo tigurikweyongyera nk'oku omuzaabibu gw'ebishuba gwakwenzire ngu tuteekateekye. Okweboheraho abantu kwagwo tikuri nk'oku kwabaire kuba, kandi emirundi mingi munonga okuza aha kanisa n'okweyoreka kwonka. Kandi shi omuzaabibu gw'amazima? Ebyagwo biri bita? Nigukura? Ogwo mubaro muhango munonga gw'abantu abarikuguma nibaija omu nteerane kandi bakaikiriza kuza omu maisho ahanyima y'okwetwa ngu barugyeyo bajunwe gurahi? Abarikukira obwingi omuribo nibaba batacamukiriire kwonka baaba nibaza omu maisho, nari nibaba batarikwetenga ekintu ky'omubiri omu mwanya gw'okwetenga eky'Omwoyo buzima? Obusingye obu tiburikushusha nk'omu bwire obu Noa yaataahire omu meeri, kandi orwigi rukakingwa, kwonka nabwo ekifubiro Ruhanga akakikyerereza okumara ebiro mushanju? Buzima tihariho n'omwe owaahindukiire Ruhanga omuri ebyo biro by'akaceceko.

Kwonka kandi obu n'obwire bw'eigyasha. N'ahabw'ekyo omu busingye obu nihateekwa kwija abo abaraakuze engano n'enkyenzi. Enkyenzi ziriyo nizikura jubajuba ahansi y'abeegyasa babi abahindura abantu bakabaiha aha Kigambo. Kwonka n'engano nazo niziteekwa kukura. Kandi aha mugore, Ruhanga naayohereza Nabi-Entumwa aine obuheereza obuhamiibwe kugira ngu abaase kwikirizibwa entoore. Nibaija kumuhurira nk'oku ekanisa y'okubanza yaahuriire Paulo, kandi omugore naija kukurira omu Kigambo okuhitsya obu araabe Omugore Kigambo, emirimo mikuru neija kureebwa omuriwe egyo etuura neereebwa omuri abo abaine Ekigambo ekitafungwire n'okwikiriza.

Ebibina by'ekalisa y'ebishuba biryayegaita omu kibiina ky'amakanisa g'omu nsi yoonna. Eki kibiina ky'amakanisa g'omu nsi yoonna n'EKISHUSHANI EKYAKOREIRWE ENYAMAISHWA. Okushuuruurwa 13:11-18, "Kandi naareeba enyamaishwa endiijo neeruga okuzimu omu itaka, eine amahembe abiri nk'ag'omwana gw'entaama, neegamba nk'ekijoka. Neetegyekyesa obushoboorozi bwona obw'enyamaishwa ey'okubanza omu maisho gaayo, neegyema ensi n'abagituuramu kuramya enyamaishwa ey'okubanza, eyaakizire obuhuta bw'okugiita. Neekora obumanyiso obukuru, nangwa n'okwiha omuriro omu iguru gukagwa ahansi omu maisho g'abantu; ahabw'obumanyiso obwo obu yaahairwe kukorera omu maisho g'egyo nyamaishwa, yaabeihabeiha abatuura omu nsi, ngu bakore ekishushani ahabw'enyamaishwa egyo eyaahutaaziibwe na rurara, ekanga ekagumaho. Yaikirizibwa kuha ekyo kishushani ky'enyamaishwa omwitsyo, ngu kigambe, kandi kiitise abantu boona abangire kukiramya. Kandi abantu boona, abato n'abakuru, abatungi n'abooro, ab'obusingye n'abahuuku, yaabaragiira kuteebwa akamanyiso aha mukono gwa buryo, nari aha buso, ngu hatabaho owaagura nari owaatunda, kureka ogwo oine ako kamanyiso, niryo iziina ry'enyamaishwa, nari enamba y'eiziina ryayo. Okukishoborokyerwa nikwetenga obwengye. Orikwetegyereza abare enamba y'enyamaishwa; ahakuba n'enamba y'omuntu; enamba egyo ni magana mukaaga na makumi mukaaga na mukaaga." Hati ijuka, bukaba buri Obugabe bwa Rooma Empagaani obwacwekyereziibwe rurara. Kwonka Rooma ekakira obuhuta bwayo bw'okugiita obu yaayegaita n'ekalisa erikweyeta ey'Abakristaayo eya Rooma kandi bakagaita obupagaani n'Obukristaayo, kandi omu buryo obwo yaahinduka Obugabe bwa Rooma Oburikwera obwabaire buri obw'okugumizamu okuhitsya obu Yesu ariija akabucwekyereza. Kwonka Rooma tekirimu yonka. Bahara baayo bari nayo buzima kandi neija kutwara obushoboorozi bwona omu Kibiina ky'Amakanisa g'omu Nsi yoonna. Eki nikibaasa kureebeka nk'ekyakubaasa kutabaho ahari bamwe kwonka buzima kishoborokyeire kimwe ahabwa boona kureeba ahabw'okuba hati hati amakanisa nigategyeka eby'obutegyeki kandi omu bwire bwonyini nigaija kworeka buzima okutegyeka okwo oku kuri kukuru. Enkora egi erikushagika okwegaita kw'amakanisa eryahereeruka Rooma erikugyebembera n'obu abantu batarakireebire omu muringo ogwo. Eki nikwo kiri ahabw'okuba omu Kushuuruurwa 17:3-6 nikigamba ngu maraaya, Babulooni y'Omubonano eshutami aha nyamaishwa. Naategyeka obugabe bwa kana, nari obw'aha muheru. Egi kanisa eya Rooma neekora ekyo. Eine entwaza y'ekalisa y'ensi yoonna omu bushoboorozi bwayo Rooma neija kuba neetegyeka, kandi ekishushani eki (entwaza y'ekalisa) nikiija kworobera Rooma ahabw'okuba Rooma neetegyeka ezaabu y'ensi yoonna. N'ahabw'ekyo abantu boona nibateekwa kuba omuri egi ntwaaza y'ekalisa y'ensi yoonna kitari ekyo beeshange omu kabi ahakuba tibarikubaasa kugura nari kutunda bataine akamanyiso aha mukono nari aha mutwe. Akamanyiso aka ak'aha mutwe nikimanyisa ngu nibateekwa kwikiriza enyegyasa y'entwaza y'ekalisa y'ensi yoonna niyo nkora ya tiriniiti, n'ebindi, kandi akamanyiso k'aha mukono ekirikumanyisa okukora okukunda kw'ekalisa y'ensi. N'obushoboorozi bukuru obu entwaza z'amakanisa ziryahiiganisa omugore w'amazima. Ekishushani eki nikiija kugyezaho kuzibira omugore kubuurira n'okwegyesa, n'ebindi. Abaheereza b'omugore baryazibirwa kuhuumuriza n'okuheereza amazima abantu abarikugeetenga. Kwonka antikristo (we wenyini) atakategyekire egi ntwaaza yoonna y'amakanisa g'ensi ekanisa y'amazima neija kutwarwa eihwe omu nsi egi okuguma na Mukama. Ruhanga aryabakura omugore We amutware aha Bugyenyi bukuru bw'Omwana gw'Entaama.

Hati nk'oku eshuura egi erikuhendera ehairwe kwenda kukuratirira ago makanisa abiri hamwe n'egyo myoyo ebiri okuruga ahari Pentekoote okuhitsya aha muheru gwayo, nituza kukozeza obwire obu obw'aha muheru kworeka eki omu Busingye bwa Laodikea.

Obusingye obu bukatandika juba ahanyima y'okutandika kw'ekyasha kya makumi abiri. Nk'oku bwabaire nibwija kuba obusingye omu ekanisa y'amazima yaabaire neeza kugaruka kuba omugore nk'oku yaabaire eri ahari Pentekoote, nitumanya ngu nikyetaagisa buzima okugaruka hakabaho amaani maingi munonga. Abaikiriza bakeehuriramu eki omu myoyo yaabo reero baatandika kutakira Ruhanga ahabw'okushukwaho okusya nk'okwabaireho omu kyasha ky'okubanza. Ekyareebekire kuba nk'eky'okugarukwamu kikabaho obu baingi

baatandika kugamba omu ndimi n'okworeka ebiconco by'Omwoyo. Obwo kikaikirizibwa ngu oku buzima kukaba kuri OKUGARURA BUSYA okwabaire buzima kumazire obwire buraingwa kutegyereziibwe. Kukaba kutarikwo, ahakuba enjura y'eigyesha neija ahanyima y'enjura y'ebiba niyo erikumeza nari enjura y'OKWEGYESA. Enjura y'eigyesha, mbwenu, niyo njura y'EISHAARUURA. Eki kikaabaasize kita kuba ekintu ekihikire kunu enjura y'okwegyesa yaabaire etakaizire? Nabi-Entumwa owaabaire ari ow'okwoherezibwa KWEGYESA abantu n'okuhindura emitima y'abaana bakagarukana n'abazaire Abapentekoote akaba atakaizire. N'ahabw'ekyo ekyo ekyabaire nikiteekateekwaho kuba okugarura busya hamwe n'okuha amagara kw'aha muheru omu kutwarwa kikaba kitakaizire. Omurikyo hakaba harimu orujwangye rw'abatahikiriire abaabaire nibatunga aha migisha y'Omwoyo n'okweyoreka omu Mwoyo Orikwera nk'oku tugumire nitubooreka. Omurikyo nabwo hakaba harimu amaani ga sitaane ahabw'okuba abantu bakaba nibategyekwa baadaimoni, kwonka tihariho n'omwe owaareebekire nk'orikukyetegyezeza. Kandi, kuhamya ku kyabaire KITAHIKIRE, abantu aba (nangwa n'obusingye bwa kabiri butakabaireho) bakeekoramu ekibiina ky'ediini kandi baayehandiikira enyegyesa ezitari omu Byahandiikirwe kandi baayeyombekyera engo zaabo nk'oku buri kibiina ekindi ekyababandiize kyakozire.

Oijukye, obu Yesu yaabaire ari omu nsi na Yuda akaba arimu. Bombi bakaruga aha myoyo etarikushushana, kandi aha kufa buri omwe akaza omu mwanya gwe. Omwoyo wa Kristo bwanyima akagaruka aha kanisa y'amazima, kandi n'omwoyo gwa Yuda gwagaruka aha kanisa y'ebishuba. Kiri aho aho omu Kushuuruurwa 6:2-8, “Ku naimukize amaisho, naareeba embaraasi erikwera, kandi owaabaire agishutamiho akaba aine obuta; yaaheebwa ekirunga, yaagyenda naasingura omu kurwana ngu abone kusingurira kimwe. Ku yaabambwire akamanyiso ka kabiri, naahurira ekihangirwe ekya kabiri nikigira kiti: Ija (oreebe)! Haarugayo embaraasi endiijo erikutukura; owaabaire agishutamiho yaikirizibwa kwiha obusingye omu nsi, ngu abantu baitane; kandi yaaheebwa rurara mpango. Ku yaabambwire akamanyiso ka kashatu, naahurira ekihangirwe ekya kashatu nikigira kiti: Ija (oreebe)! Ku naimukize amaisho, naareeba embaraasi erikwiragura; kandi owaabaire agishutamiho akaba aine eminzaani omu ngaro ze; naahurira eiraka ahagati y'ebihangirwe ebiine amagara ebina, nirigira riti: Endengo y'engano y'edenaari, n'endengo ishatu za sayiri z'edenaari; kwonka amajuta na viinyo otabishiisha. Ku yaabambwire akamanyiso ka kana, naahurira eiraka ry'ekihangirwe ekya kana nikigira kiti: Ija (oreebe)! Ku naimukize amaisho, naareeba embaraasi kisa, n'owaabaire agishutamiho akaba naayetwa Rufu, Okuzimu yaamukuratira, baaheebwa obushoboorozi aha kicweka kimwe kya kana eky'ensi okwitsa abantu rurara n'enjara na rufu n'enyamaishwa mbi z'omu nsi.” Reeba oku ogwo mwoyo gwa Yuda gwagarukire nk'otembire embaraasi erikwera. Ekaba neeyera. Eri haihi kushushanira kimwe n'ekihikire, nk'oku Yuda yaabaire ari haihi kushushanira kimwe na Yesu. Akaheebwa ekirunga (ogwo otembire embaraasi erikwera). Bata? Omwoyo ogwo hati gukaba guri omu mwebembezi w'entwaza y'Abanikolaiti kandi akaba ari paapa ojwekirwe ekirunga ky'enshonda ishatu owaabaire ashutami nka Ruhanga omuri hekalu ye, arikweyeta omutsigire wa Kristo. Omutsigire wa Kristo ku kiraabe nikimanyisa “otsigaireho nka Kristo” nari “omu mwanya gwa” nari “ojwekyeire Ruhanga” obwo paapa akaba naayeyeta Omwoyo Orikwera nari naimuura Omwoyo Orikwera, naakora omu mwanya Gwe. Ogwo gukaba guri omwoyo gwa Yuda omuriwe gurikukora ekyo. Reeba oku yaasingwire - akagyenda naasingura omu kurwana ngu abone kusingurira kimwe. Ekyo Kristo tarakikozire. Abo bonka Abaamwizireho n'abu Ishe yaamanyire ira. N'ahabw'ekyo omwoyo ogwo gukagumizamu kandi eizooba rimwe buzima guryataaha omu muntu orikwija kwebembera Ekibiina ky'Amakanisa g'omu Nsi yoona, nk'oku tubaire nitugamba. Kandi ahabw'ezaabu ye (ijuka ngu Yuda akaba ari omubiiki) aryategyeka ensi yoona, kandi egyo ntwaza ya antikristo eryayegaruriza buri kintu kandi egyezeho kutegyeka buri muntu. Kwonka Yesu aryagaruka abacwekyereze boona n'okumurinkana kw'okwija Kwe. Kandi omuheru gwabo guryaba enyanja y'omuriro.

Kwonka embibo y'amazima eryaba eta? Kiryabaho nk'oku twagamba. Abantu ba Ruhanga bariyo nibatebeekanisibwa Ekgambo ky'Amazima kuruga aha ntumwa y'obusingye obu. Omu mugore nihaija kubamu okwijura kwa Pentekoote ahakuba Omwoyo naija kugarurira kimwe abantu ahu baabaire bari omu kutandika. Ekyo ni “Oku nikwo Mukama arikugira.”

Ni “Oku nikwo Mukama arikugira” ahakuba okwo nikwo Yoeli 2:23-26 arikugira, “Imwe baana ba Saayuuni 'mwe, nimushemererwe; mwesiimire omuri MUKAMA Ruhanga waanyu; ahabw'okuba abahaire enjura y'eibiba ey'orugyero ruhikire, kandi yaabagwisiza enjura nyingi munonga ey'eibiba n'eya katumba nk'eya bwabiso. Amahuuriro garyaijura engano, amaato gaijire viinyo n'amajuta bisheeshekye. (Ndyagarura busya) emyaka ei enzige zaariire, ebitootea, kahembwe na rushanda, eihe ryangye rihango, eri Naabateize. Muryarya bingi, muhaagye, muhimbise eziina rya MUKAMA Ruhanga waanyu, owaabatwaize gye omu muringo gw'okutangaaza; n'abantu Bangye tibarigaruka kuhemurwa bundi.” Hati nikigira ngu Ruhanga naaza “kugarura busya.” Obusingye bwa Luteeri tiburagarwire busya ekanisa; bukatandika okuhunduuza. Obusingye bwa Wesili tiburagarwire busya. Obusingye bw'Abapentekoote tiburagarwire busya. Kwonka Ruhanga naateekwa kugarura busya ahakuba Tarikubaasa kwehakana Ekgambo Kye. Oku ti kuzooka kw'Ekanisa; “n'Okugarura busya.” Ruhanga naija kugarura ekanisa ahari Pentekoote eyaabandize buzima. Hati yetegyezeze omu mushororongo gwa 25 nigugamba ahabw'enki nitwetenga okugarura busya. Enzige, ebitootea, kahembwe na rushanda biriire byona kureka omuzi n'akacweka kakye k'empimbi. Hati nitugambirwa ngu obukooko obu bwona n'akooko kamwe akari omu madaara g'okukura agatarikushushana. Ekyo kihikire. Obwo bukooko n'omwoyo gwa antikristo gworekirwe omu kibiina ky'ediini, ekigombe ky'ediini n'enyegyesa y'ebishuba omu busingye bwona. Kandi ogwo muzi mukye n'empimbi nibiza kugarurwa busya. Ruhanga tarikuza kubyara ekanisa nsya, kureka ekimera Kye ekyabandize naaza kukigaruzayo kihindukye embibo eyaabandize. Ariyo naakikora nk'oku kigambirwe omu mushororongo gwa 23, okurabira omu kwegyesa, nari enjura “y'eibiba.” Ekiraakurateho nihaija enjura y'eigyesha nari okwikiriza

kw'okutwarwa.

N'ahabw'ekyo omu bwire obu bwonyini turi omu kuhikiirira buzima okwa Matayo 24:24 “babone kuhabisa n'entoore, kyaba nikibaasika.” Mbweni n'oha ogwo origyezaho kuhabisa entoore ezo? Buzima, n'omwoyo gwa antikristo omu “bashukirweho amajuta ab'ebishuba” ab'omu biro ebi eby'aha muheru. Abanyabishuba aba baaherize kwija omu “Iziina rya Yesu” nibagira ngu Ruhanga abashukireho amajuta ahabw'ebiro by'aha muheru. Nibo ba Mesia ab'ebishuba (abashukirweho amajuta). Nibagira ngu ni baanabi. Kwonka ni bamwe n'Ekigambo? Na busha. Bakyongyeireho nari bakicwireho. Tihariho orikuhakanisa ngu Omwoyo wa Ruhanga naayeyorekyera omu biconco omuribo. Kwonka nka Balamu boona baine zaapuroguraamu zaabo, nibashaba sente, bakoresa ebiconco, kwonka beehakana Ekigambo nari Bakiraba aha rubaju ahabw'okutiina ngu okutaikirizana nikubaasa kukyendeeza emigisha yaabo y'okutunga amagoba maingi. Kwonka nabwo nibabuurira okujunwa n'okucungurwa ahabw'amaani ga Ruhanga, nka Yuda, owaabaire aine obuheereza bumuhairwe Kristo. Kwonka ahabw'okuba bari oruzaaro rubi, ekirikurugamu bagira omwoyo mubi ogurikubeezirikisa. Abanyadiini? Oo, mugenzi! Nibakira entoore omu kukora n'amaani n'obweziriki, kwonka n'omwoyo gwa Laodikea, tigwa Kristo, ahakuba nigusherura abantu baingi, zaapuroguraamu mpango n'obumanyiso oburikutangaaza omuribo. Nibabuurira okwija kwa kabiri kwa Kristo, kwonka beehakana okwija kwa nabi-entumwa, n'obu boona arikubakirira hare omu maani n'obumanyiso hamwe n'okushuuruurirwa okw'amazima. Aa eego, omwoyo ogu ogw'ebishuba ogurikwenda kushushanira kimwe n'ogw'amazima omu biro ebi eby'aha muheru, nigubaasa kumanyirwa aha kuteishuka aha Kigambo kusha, kandi obwire bwona ku gurikukwatwa niguhakanisa Ekigambo, nigugaruka omu mpaka nizo zimwe ezi tworekire ngu zigwire: “Twine obumanyiso, tikwo kiri? Nituteekwa kuba turi aba Ruhanga.”

Hati tutakahendeire, niinyenda kureeta ekiteekateeko eki. Kuruga enyima tubaire nitugamba aha Mbibo y'Engano erikuziikwa, bwanyima erikutaho otubabi tubiri, bwanyima eshisha, bwanyima otushiisha tw'amazima. Eki nikibaasa kutuma bamwe baayebuuza yaaba tugizire ngu aba Luteeri bakaba bataine Omwoyo Orikwera ahabw'okuba bakahamira aha kwegyesa kw'Okwihwaho orubanja. Nikibaasa kutuma bamwe baayebuuza aha Bametsodisiti, n'abandi. Ngaaha sebo, titurikugamba tutyo. Titurikugamba aha muntu okwe nari abantu, kureka OBUSINGYE. Luteeri akaba aine Omwoyo wa Ruhanga, kwonka obusingye bwe bukaba butari obusingye bw'okugarura busya okwijwire ahabw'okundi kushukwaho nk'okw'omu kutandika. Nikyo kimwe na Wesili, Booth, Knox, Whitefield, Brainard, Jonathan Edwards, Meuller, n'abandi. Buzima bakaba baijwire Omwoyo Orikwera. Eego, buzima bakaba baijwire Omwoyo Orikwera. Kwonka obusingye obu buri omwe yaatwiremu bukaba butari obusingye bw'okugarura busya, kandi tiharabaireho obundi busingye bwona kureka obusingye obu obw'aha muheru, obusingye bw'okushwekwa omwirima ndi ndi gw'okutaana na Ruhanga. Obu n'obusingye bw'okutaana na Ruhanga kandi obu n'obusingye bw'okugarura busya, obw'enziga eijwire. Omu busingye obu, byona bihweire.

N'ahabw'ekyo nituhendera Obusingye Mushanju bw'Ekanisa, nitugamba ebi Omwoyo yaagambire byonka omuri buri busingye, “Oine amatu ahurire eki Omwoyo arikugambira amakanisa.”

Niinyikiririza kimwe ngu Omwoyo wa Ruhanga abaire naagamba naitwe, ti kutwegyesa amazima g'obusingye kwonka, kureka omu bwesigwa Abaire naakoragana n'emitima kugira ngu ebaase Kumuhindikira. Ekyo nikyo kigyendererwa ky'okubuurira kwona n'okwegyesa, ahakuba omu kubuurira n'okwegyesa Ekigambo nimwo entaama zihurira eiraka rya Ruhanga kandi Zikamukuratira.

Tihariho omurundi na gumwe obu ndeetera abantu obutumwa kugira ngu bankuratire, nari beegaite aha kanisa yangye, nari kutandikaho ekanisa nari ekibiina ky'ediini. Ekyo tinkakikoraga kandi tindikwija kukikora hati. Tiinyine omwete omu bintu ebyo, kureka nyine omwete omu bintu bya Ruhanga n'abantu, kandi ku naakubaasa kuhikiiriza ekintu kimwe kyonka nkaamarwa. Ekyo kintu kimwe n'okureeba haatandikaho obuzaare bw'amazima bw'omwoyo ahagati ya Ruhanga n'abantu, omu abantu barikuba ebihangirwe bisya omuri Kristo, baijwire Omwoyo We kandi nibatuura nk'oku Ekigambo Kye kirikugira. Niinyeta, nyehanangiriza kandi mpabura boona kuhurira eiraka Rye obwire obu, kandi Mumuhe amagara gaanyu kyarimwe, nk'oku ndikwesiga omu mutima gwangye ngu Nkamuha ebyangye byona. Ruhanga akuhe omugisha, kandi okwija Kwe kushemeze omutima gwawe.



[www.messagehub.info](http://www.messagehub.info)

Obutumwa obu bukabuurirwa  
**William Marrion Branham**  
 “... omu biro by'eiraka ...” Kush 10:7